

Taitaasihopi Utipiho

Kimandi Taitaasihopi Utipimandapi Nesipihande

Taitaasiho so Porihome piwiha nunyati natausaasisawihiyaami wore. Ko ami Porihome otipipati kahati kahati kawisahore. Poriho naasikura Timotehopi utipiho jiho jipatipaisura ami Taitaasihopimoaisangi kura jipatipiyahore. Taitaasiho Autaahaatihomi isihiyai iwinjatitandi aimi nomasihura kimo utipimo Poriho jipatipiyahore. Poriho Timotehoai piwiha kaundati jipatipaisiha ami ka naasika Taitaasihopisangi jipatipiyataise. Komi jipatipaisiha Autaahaatihomi isihiyai iwinjaawi bimohiyihyaapuni ami Autaahaatihomi isihiya Kopi giwunyaahohiyihya kiyaami sisiwi piwaatiwi daiwi bimitaatiwihiretapi neti japihi giwunyaati kaundataase.

Taitaasihopi Piwiha Napimasataise

Poriho Taitaasihoai ipihirete gaahuraare undisiha (1:1-4)

Nyahi Autaahaatihomi isihiyai iwinjaawi bimitaatiwihiyai
namihandihaawaahi kiyaami daiwi kaiwi bimohirihireti
biyaati mmonaati kainjaati ipoti namihandihaawe undisiha
(1:5-16)

Poriho Taitaasihoai satipi kaundipi ami saimbi katipunje undati kaundisiha
(2:1-3:11)

Poriho komi daayati otipipati kiyati bimirihiretapi piwiha kaundati
ami jihaati ipihirete gaahure undati komi piwiha kaundati
osasepihaasiha (3:12-15)

1 ¹ Nini Porihonini piwiha kima jipatipiyataayo. Nini Autaahaatihomi otipipatihonini ami nini Jisaasihomi kaiwaiwaapi ausaati piwiha kaunditandihonini Jisasi Kiraisihomihonine. Ko Jisaasiho nanimahanati ahinihionine, isihiya Autaahaaticho japihi numwaati isihiya kimiya aimi nisihiye tati namihanati ahewisawihiya nahatiyaami Autaahaatihopi giwunyaahotihandi neti watipurimati utaaremwaitandi natanoasihonine. Aindi ami nini piwiha titihi akaahaahihi kandunjato. Sa piwa atisawaawi Autaahaatihomi gwinyaati maaritirihiretapi giwunyaata nusesipatonihiki kireti japepihiritaatiwihaare. ² Nini kiyaami giwunyaahotihandi neti

watipurimaitande. Ami Autaahaatihopi kiya giwunyaahotindami tanyaaha siyate. Kiya asiyaimatiwi Autaahaatihoaisawi maasi nasisoaari bimitaatiwihandi Autaahaatiho nunyonih naitaatiwi gwinyaapi maaritiwi jatotihandi kiya naitaapo, tati nasooanati noaipataise. Jihi aimehura Autaahaatiho kahapaamapipa sangi kiyati ahiyahura asiyaanimatitihahandi nanyamitandi aimi katati ahiyahanditihe. Iyati ko Autaahaatiho titihi akitinihi katahore. Aihi sandapi nini kiyaami giwunyaahohitihandi neti watipurimati anditiwiwataayo, kiya maaritiwi watipitiwi bindawa sandi asiyaanimatitihahandi Autaahaatiho nanyamitandaindihandapi jatitaatiwo. ³ Aihi komi asisiha gwinyaasiheti isihya usaisi namihanati natausoaasataise, komi piwiha gaaha awusaitaatiwo. Sa piwa isihya asitimatitaatiwihandi naitaatiwe, tati neti ausaimaninati isihiyaisi nunjataise. Iyataati ami ningisangisi piwiha sika awusaitandi Autaahaatiho nyangisi japihi nanyamaasiho nanimahanati ahinihionine.

⁴ Taitaasihone, kima piwiha kinyapi nini Porihonini jipatipaindi nusoasataayo. Autaahaatihomi piwiha gisi nini kahitonih ami kinyi kopi giwunyaahingitihandaahi kinyi noaipapi titihi nisi maasihihone. Aimb ami gisangi isihyaani taahiyihyaani Autaahaatihopi giwunyaahohipatamataimbi giwunyaapihone. Apiho Autaahaatihouni nyangi japihi nanyamaasiho Jisasi Kiraisihouni kindari gaahati kahimi gitatamanisaihi kinyi napaisaati baimbi bimitaapi nini nunjeniti kindarapi gaapundataayo.

Taitaasiho Biyati Mmonati Autaahaatihomi Isihiyai Iwinjatitaatiwihiyai Namihandandihandapihaare

⁵ Durihiri neti otaatemasiwati yapipati Kiritihanda nini gisi nangimasisi nasotimandi apaapimahe. Otipipati wapa sangi titihemandih kapa kinyi nepi titihemapi owemaitaape. Aimb ami isihya Autaahaatihopi giwunyaahohiyihiyai iwinjaawi bimitaatiwihiyai namihanipi ahiwitaape, yapipati Kiritihandami aunahipa nahatewaraaho, nini jihi aimi piwiha kahitohirihiri kireti japepihiripo. ⁶ Isihya kimiyahaiwa kaiwihiyai namihanipi ahiwitaape. Autaahaatihomi isihiyai iwinjaawi bimitaatiwihya isihyaami ndiheti maatiwihiri wapa kamaiwihya. Ami kiya apopaati nehi naasaamaatisawihya. Iyataati ami kiyaami manyinya baiwi Autaahaatihopi giwunyaapihaya. Iyataati ami isihya kiyaapi saiwi saiwi maipihaiwa kaiwihiye maatiwi apihimanahiya. Ami kiyaami sani sapiyaami piwiha baiwi napaitiwi atiwiwihya. Saiwihiyaisi kinyi namihanipi ninaasiyai kapihi kapihi ahiwise, Autaahaatihomi isihyaami mitihiyaimatiwi kiyaisi iwinjaawi bimitaatiwo. ⁷ Autaahaatihomi isihiyai iwinjaawi bimitaatiwihya saiwihiyai ahiwise. Sandi nini apaapimaato. Kinyi aimi mmonipi gwinyaapihone. Isihya

noaipapi Autaahaatihopi giwunyaahohiyihyaami mitihiyaimatohiyihya siya Autaahaatihomi otipipati jaawi bindawa kawitaatiwihye. Isi kiya baiwi itatamaniwi daiwi binyaihi isihya kiyaami maipihaiwa windi mausopihya. Aiwi ami kiya wiretitiwi maatimaatimiwihya. Aiwi ami kiyaisi apowitandihandi keti namwaipahya. Aiwi ami kiya waapoho namaaniwi namaahariwihya. Aiwi ami isihya usaisi tiwohipati namepi kamaiwihya. Aiwi ami kiya nawiho taahiho waati naitaatiwihandapi maariho namunyawihya. ⁸ Aiwi kiya isihya kaanihi wapihapihya napisaihihiyai baiwi piwaundiwi numwaapi iwitatamaniwihya. Aiwi ami gaahaiwaahihhi napaitiwi japepihiriwi kaitaatiwi apipaahi maaritimapihya. Aiwi ami kiya titihi gaahya ainahiyihya bindawa Autaahaatihomihireti baiwi japepihiriwihya. Aiwi ami kiyaami ambipatami maaritiwaiwai baiwi ipihatiwi jatiwihya. ⁹ Autaahaatihomi piwiha Jisaasihomi kata kaiwaiwaapiha nyahi kataunjotiha biyati anitisati namaamati isiwataho. Ko siyati Autaahaatihomi isihiyaisi piwiha akaaha kataunjati anditiwuwitendo. Iyataati isihya usa nyami piwiha kataunjotihai nemapi tipi ipihatiwi, wa katiwunjojhihaapi sa piwiha akaahaamaahe nehhe, tati kiyaisi neti nunjitando.

Yapipati Kiritihanda Isihya Taahiyihya Jaipipaisahya Bindawaapo

¹⁰ Sandi kahitotimandi apaapimaato. Isihya Judaahya taahiyihya Kiraisihopi aimi giwunyaahohiyihya kiya kiyaami jihaiwa namaamapi anitiwi isiwatawaawi kataunjohihai ipihatiwimapi isihiyaisi kaiwa tipi naupwi katiwunjauhito. Isihya siya Judaahyaami kiyohipati kaiwi isihya Jisaasihopi giwunyaahohiyihyaati nahatiyaati sami ambipati namandipatiwise, tiwi katiwihya sapihi Kiritihanda bimauhi kandapi kahito. ¹¹ Isihya saiwihya siya maipihati kaiwi isihyaami nawiho nusaitaapo. Aiwi kiya nyahi Jisaasihopi giwunyaahohiyihyaanini wiwa kamaitaahetahaiwa kaiwi isihyai katiwunjitaapo. Kiyaami saiwaaraahi isihya usaisuni ami nususasi ninaasusasisuni nepi kiyaami maariho gwinyaahohiwaiwa nepi nusopisasiwihye. Isi isiya siyaami kiyohiwaiwaapi owe saiwa windi kamaiwise, undipi ipihatimbi kiyaami maahomwaanji niwisapu. ¹² Jihura yapipati Kiritihandi kandaahapiho wo amitiha gaaha gwinyaaho satati katise. “Isihya Kiritihandaahapihya apipaahi jaipipaisahye. Kiya kohasipihohi ainjihipipa nandapa pihititi naninjati nandapaapi uripipasihhi pohipaiwi ahosopatamataiwihye”, tati katise. ¹³ Ye sa piwa titihi akaahaare. Isi kinyi kiyaisi baimbi piwiha watipitipi kaunde kiya kiyaami giwunyaahohitihandi baiwi japihi titihematito. ¹⁴ Aiwi ami kiya piwiha kiha kiha jaiwitiwiha atihiri ahiyawai baiwi Judaahyaami bausandisawihyaami piwiha atihomaawitaatiwo. Aiwi ami isihya sawana kiyaami winihapipa kahatamatipetahapa isiwatawa piwiha akaaha dawaatemahohitihandi namaitaatiwo.

¹⁵ Utaaho Jisaasihopi giwunyaasiho isihyaami piwiha mambihaiwai nemahonihi kandapi Autaahaatiho koaisi kinyi maipihandi kiyapaise munditaise. Owe. Iyataati utaaho wo Kiraisihopi gimaawunyaasiho maipihomi komi kaimbipa nahataapa sapa Autaahaatihomi ndiheti maipihaiwandaise. ¹⁶ Aiwi ami kiya kiyaami maahomwaanapi satiwi katiwihiye: “Nyangisi Autaahaatihopi ginyunyaatati nanyesipatahiyaane”, tiwihiyaare. Satiwi katawaahandi kandi kiyaami kaiwi japepihiriwi bimohitihandi nyahi mmonihaawi kiya Autaahaatihoi ahosumwahauhi nyahi usonahaayo. Autaahaatiho kiyaapi windi apipaahi maarimitise, kiya piwiha baiwi atihomiwi piwiha namapihiyaasi wiwa ami titihi gaahaiwaapi nenoahitiwihiyaasi windi kamaitauho.

Gwinyaahiya Aunihiyaapihaare

2 ¹ Isi kinyi koninihi namaamihaapi piwiha akaaha isihiyai katipunjingirihiri kireti japepihiripi katipunje. ² Kiya gwinyaahiya aunihiya usihiyai satipi kaunde. Sahi isihiyai usoniwi gwinyaitaatiwihandapi sami amitiha biyati nasesipatane. Isihiya kimo nyami awaisihoe tiwi kinyi piwiha atihitaatiwe. Iyataati ami sami ambipatami maaritindihandi baiwi ipihatiwi jatitaatiwe. Aiwi ami piwiha titihi akaaha sahi baiwi atiwi nepi gwinyaitaatiwe. Aiwi ami isihiyai maariho nunyawawi gaahati kawitaatiwe. Aiwi ami samiheti naanjihaiwa nasoaipahonihi kawai ipihatiwimapi andititiwi bitoaitaatiwe unde.

³ Aimi ami asihiya aunihiyaisangi naasika satipi kaunde. Sahi asihyaati aunihiyaati itatamaniniwi anjini ainahiyihyaati bimaawise. Aiwi ami sahi wo waatami wapa kiyonihapaapi siya siyopo tiwi isihiyai katiwunjawi dahomaiwise. Aiwi ami sahi waapoho naharitaatiwiho nandaatiwihandapi maariho namunyawise. Saiwa kamaiwi titihi gaahaiwa katiwunjitaatiwe unditaape. ⁴ Kaundisamihi ami kiya asihiya aunihiya kinyi katipunjingiha nepawi asihiya gwinyaahiya apwainyihiyai katiwunjisaihi ami kiya atiwi nepi baiwi warisaisuni ami kiyaami manyinyaisuni maariho nunyawawi gaahati kawito. ⁵ Aiwi ami kiya kiyaami ambipatami maariwaiwai baiwi ipihatiwi jatitaatiwo. Aiwi ami kiya kihiyaisawi dahomaiwi anjini ainahiyihyaatitaatiwo. Aiwi kiyaami anjipipihini napaitariwi otipipati baiwi kaitaatiwo. Aiwi ami warisaami piwiha kaundotiha napaitiwi atiwiwi kaundohipipa kaitaatiwo. Saiwi kiya kaisaihi isihiya usa kiyaami gaahati wanihati mmonawa Autaahaatihomi piwiha akaahe tiwi gwinyaawaawi kiya windi Autaahaatihomi piwihaapi sisipihimaatito.

Piwiha Gwinyaahiya Wainyihyaapihaare

⁶ Ami usihya gwinyaahiya wainyihyaisangi piwiha kima naasika kaunde. Kaundisamihi kiya kiyaami ambipatami maariwaiwai baiwi

ipihatiwimapi jatitaatiwo. ⁷Aimbi ami kinyi kiwahongisangi nasisoaari gaahaiwaahihi kaimi numwe. Saisamihi isihiya kinyi gaahaiwa nahatewa kaingiwaiwa baiwi gisopi nepi kaiwa kaito. Aimbi kinyi piwiha katipunjapaahura piwiha baimbi akaahaahi katipunjapaapi piwiha akaaha nahata ausaapi kaunde. ⁸Aimbi ami kinyi piwiha nehi titihi akaahaahihi katipunje. Saimbi kinyi gaahati kaisamihi giwunyaahohiyihiyaanangi isihiya nyapatitotiwiyawa, kiya gaahati kiyauhi nyahi maipihati kawisono, tiwi mausonihhi nyapi piwiha maipiha windi kamaanyatitaatiwo.

Otipipatihyaapi Piwihaare

⁹Aimbi ami otipipatihya nawiho namepi nehi otipipati kiyohiyihiyai watipitipi kaunde, kiya kiyaami awaisawihyaami piwiha nahatewa kaundohiwaiwa baiwi atiwiwi japepahirito. Aiwi ami kiya kiyaami awaisawihya otipipati sapa kanyito tiwi maaritiwi gwinyaahohipipa baiwi kawito. Aiwi ami kiya kiyaami awaisawihya piwiha kaundisaihihaapi wihoaanj nepi yahwiwi wiretimunditaatiwo. ¹⁰Aiwi ami kiya kiyaami awaisawihyaami wapa otihatihapi ninaasonyaahi ikonihhi namausaito. Saiwi ikopa kamaiwi titihi ainahiyihya itatamaniwi kahapaamapipa iwinjatisaihi kiyaami awaisawihya, nyami otipipatihya gaahiye tiwi maarititaatiwo. Kiya saiwi gaahati kaisaihi isihiya usa mmonawaawi wipaiwi wanihireti kaisaihi Autaahaatiho nyangi japihi nanyamaasihomi piwiha katawaunjohihaapi mmonawa titihi akaahe tiwi gwinyaitaatiwo.

Nyahi Ainahiyihyaanini Bindahaawi Kiraisiho Japihi Napitaisi Jatitahaawo

¹¹Giwunyaahohiyihiyai kinyi watipitipi piwiha akaaha katipunjehitotimandi apaapimaahe, Autaahaatiho isihiya nahatiya yapipatambihiyai gaahati kawisati Jisaasihoi natausaasihhi kimaapi yapipataapihi nasataise, isihiyai japihi maipihandaatihapi numwaitando. ¹²Autaahaatihomi gaahati kanyipati nanyisataise saitahaawo. Autaahaatiho windi maarimitiwaiwa kamaaya namaitihaawe. Iyataati ami nyami ambipatami maaritirihireti japepihira kiyohipatamatiyaati windi kamaitihaawo. Iyaati ami nyami ambipatami maaritiwaiwa daahi ipihatisaati titihi gaahaiwaahi nahateweti kiyaati Autaahaatihomihyaanimataati wani kimura yapimbataapihi bimitihaawo. ¹³Nyahi siyaati kiya awaindihandi maarititihahandi nanyoapaitandihandapi jatitahaawo. Sandi nyami Awaisiho Autaahaatiho watipihhi japihi nanyamaasihhi Jisaasihhi komi yundanyaahaisati japihi napitandihandapi jatitihahandapito. ¹⁴Jisaasihhi so nyahi nahatiyaanapi nyangi nyatatamanati nanyamaitandi komi ambipati ipi titihi atawihateti

nunyanataise. Nunyainjitihaandaahi neti gaahiyaanenyamataise. Nyahi noaipawaati titihi komihiyaanimataati gaahaiwaahihi kaitihaahandapi apipaahi maaritaamaitihaawo.

¹⁵Saiwa aimi kahitohiwiwa namaamihaapi koŋinihi giwunyaahohiyihiyai nasisoaari katipunje. Piwiha akaaha katahunjotiha baiwi atiwi nepi japepahirita watipitipi kaunde. Aimbi ami isihya piwiha akaaha ka atiwi gwinyaawaahandi kandi piwiha akaaha kai ahosumwahohiyihiyai ami kinyi titihpumapi kaunde. Saiwa kinyi andititipi watipihonji awaisihonjimatipi watipihandisapi kaisamihi isihya gi gisonawaawi, utaaho watipihandisa kiyataisi komi piwiha akaaha kandaase, tiwi gwinyaitaatiwo.

Kima Piwima Kiraisihomihyaanini Gaahaiwa Andititaati Kiyaati Bimitihaahandapihaare

3 ¹Kinyi baimbi isihiyaisi gwinyaitaatiwihaiwa jihaati kaunde. Kaundisamihi kiya baiwi kiyaami gamanihomi piwihauni ami gamanihomi otipipatihyaami piwihauni baiwi atiwiwi japepahirito. Aiwi ami kiya otipipati nahatewa baiwi kaitaatiwi timetitaatiwo. ²Aimbi ami kinyi baimbi kiyaisi kaunde kiya isihya usaapi maipihaiwa katiwi windi itihimaatitaatiwo. Aiwi ami kiya itihinniwi ami timundaatiwo. Kiya itihimaniwi nehi maariho naasohitanihi bipisi isihyaami ndiheti bimitaatiwo.

³Nini sandi katohitimandi, jihura nyangisangi biyaati gwinyaitihaahandi owetih Autaahaatihomi piwiha nemawaahiyaane. Iyataati Bwaasirihiri jaiwinyatihi naharisaati kihaiwa kihaiwa kiyahaayo. Kiyonihi nyami ambipati maariho gwisahaami maaritindihandi noaipati apipaahi watipindaati nyami maariho kaiwaapi nyandotaise. Aihhi nyahi isihya usaapi itihita mimaipiya usonaati ami isihya usa kahapaamapipaisahiyaisi usonihaawi kiyaapi aponyahiyaane. Iyaati ami nyami tiworisa nyapi itihitiwi pohipinyisauhi ami nyahi yawanaanisangi naasikati kiyaati itihina pohipinaahiyaane.

⁴Siyonihandi kandi Autaahaatiho nyangisi japihi nanyamaasiho nyangisi maariho apipaahi nanyinyati nyami naisohoematataise. Ko siyati kaindihandi nyami ndiheti auta noaipasitimandi kandaahi nyangisi japihi nanyamaataise. ⁵Autahaatiho nyangisi japihi nanyamaasitimandi, nyahi biyaati bindihaawi gaahaiwaahihi kiyonihi nyasonati gwinyaataati kandapi japihi nanyamaataamaise. Owetise. Nyahi wiwa gaahaiwa kaitihaahandi apipaahi owetihihandi kandi ko nyapi maariho asipinyindihandaahi nyangisi japihi nanyamaataise. Autahaatiho nyami maipihaiwa bausati nenyamasihhi nyahi noaipawaati wanihiyaanini manyinyaanimatahaayo. Aihhi Itipihho Gaaho asiyaanimatitihahandi nanyinyataise. ⁶Jisasi Kiraisiho nyangisi japihi

nanyamaasihomi otipipati awaindihandi kaindihandaahi Autaahaathiho Itipihohi Gaahomi watipihandi waati tisaahiwati nanyinyataise. ⁷Ko siyati kaindimandi nyami maipihaiwa nahatewa nenyamati nyangisi nisihyaati gaahyaati ainahiyihyaate, nyatitande, Jisasi Kiraisihomi maariho nyapi asipaindihandaaho. Iyati ami ko nyapi Apiho nanyamihainjitihandapi siya asiyaimatiwi nasisoari bimitaatiwihandi naitaapo, tati aimi ko katati ahinyihihyaane. Sandi asiyaanimatitihahandi naito taati nyahi gwinyaawaati jatotihandihahi naito.

⁸Kima piwima nini aimi kandi jipatipiyohima titihi akaahaare. Isi ka kiyaisi kinyi baimbi ausaapi kaunditaapi nini maaritataayo. Saimbi kaisamihahi isihya Autaahaatihopi baiwi giwunyaahohiyihya kiyaami gwisihahi maariho titihi gaahaiwaahihahi kahatamatipetahaiwa kaitaatiwihandi noti kiyaamiheti watipititandohi. Iyataati saiwa gaahaiwa isihiyaisi nga biyati gaawimatitandihaiwe. ⁹Iyataati isihyaami kihaiwa kihaiwa katiwi nasenihotihanduni, ami saisatoyaami ambipati ahiyawahi piwaatotihanduni, ami itihapipauni ami Mosesihomi winihapipaapuni itihinnihahi kiyohiwaiwa saiwaasi kinyi namasisi gisi kaanihi yandihahi bime. Iyataati nyahi saiwaapi aimi ginyunyaatahiyaane. Saiwa nyahi gaahaiwa kaitihaahandapi neti ginyunyaati nanyisitandihaiwaamaahe. Owetise.

¹⁰Iyataati utaaho wo maipihaiwa kihaiwa kiyati neti Autaahaatihomi isihiyaisi tipitapaahaara kaisihoahi baimbi yataira titihapumape. O kinyi saimbi titihapumasamihandi kandi ko windi biyati atihomaahisonaahi gaasi koahi ahosumapi namihaapusoase. ¹¹Kinyi gwinyaape. Isihya saiwihiya siya daihira titihi gaahira namasisi aimi maipihira nowaayopo. Iyataati komi maipihandi kaindihandi kandi neti koaisi nusopisatataise.

Piwiha Ipotihaare

¹²Isi nini Atemaasihoaisangi ami Titikaasihoaisangi kinyapi nandusaasisanaahi kinyi keti kuraanihi dosisi ningisenda Nikoporisihandaahapi namme. Kinyi aimi gwinyaapihohi. Mbipa waati mbwaataati durihiri waati tiwayaati kiyonaahi Nikoporisihanda bimito hititi kahitonihohi. ¹³Utaaho kimo Romihyaami winihapipaapi biyati kataunjisiho Sinaasihoaisuni ami Aporosihoaisuni kinyi baimbi daihira kurami napitaatimihira daupwi natipusoase. Saimbi kaisamihahi kuri daihiraapihapaapi windi nenoahimetitaatimo.

¹⁴Nyami isihya Jisaasihopi baiwi giwunyaahohiyihya nahatiyahi kaunde, isihya usa kahapaamapipa wapa anditihonihahi bimitaatiwihapa nusetihonihiyahi numwitaatiwihandapi anditihonihahi baiwi otipipati kaitaatiwihandapo. O kiya saiwa windi kamaiwi nehi bindawaawaahi Autaahaatihomihireti windi minjapepihiritaaapo.

¹⁵Isihya Autaahaatihopi nisataiwi giwunyaahohiyihya kimbihahi ningisawahi maasi bimohiyihyauni ami ninuni gisi ipihirete hitahaato.

Isi ami nyami ipihirete hitotihandi nepapi sapihi nyamataiwi
Autaahaatihopi giwunyaahohiyihiya nyami naisihiyaisi ipihirete unde.
Autaahaatiho gaahati kasisati jatatamanati jainjaati bimone undati
Poriho Taitaasihoai kaundataase.